

巢雲詩集

明板



巢雲詩集目錄

一卷

五言古詩二十二首

二卷

七言古詩四十三首

三卷

五言律詩百五十首

四卷

七言律詩二百二十八首

五卷



五言排律詩三十四首

六卷

七言排律詩四首

七卷

五言絕句詩六十八首

八卷

七言絕句詩七十三首

共詩六百二十二首

巢雲詩集目錄

巢雲詩集一卷

聞喜裴邦奇撰

五言古詩

擬李陵送蘇武歸漢兼寄司馬遷

蕭蕭胡馬鳴大漠風沙起臨岐挽舊節送彼遠
遊子愁結天山雲淚滴交河水轉盼成參商躑
躑行且已把手作悲歌長劔復相倚因之懷故
壠悵然猶拊髀憶昔天漢間而我同羈此子令
歸漢庭我繫單于壘相別在一杯相思隔萬里
白頭當自愛交情決生死慇懃託片言為我謝

太史南北各風烟清光徒仰止終無會面期寧
不感知已

招隱

淮南抱貞素不爲春草遊念彼隱君子空山非
久畱招來日容與攀援叢桂幽濯纓臨巨壑振
袂登高丘玄猿和其嘯白鹿與之儔寄言同調
者捨此復何求

俠客行

少年任遊俠不數黃鬚兒彎弓跨獵馬南山射
熊羆聞道邊警急赴難不移時仗劍擊狂寇突

衝百萬師豈圖千金壽祇爲靖邊陲功成拂衣
去不言身是誰

門有車馬客行

門有車馬客下車拂衣塵入門相把袂道是同
鄉人形容不復識姓氏頗記真延之坐中堂銜
杯斂所親謂我離鄉土屈指二十春音書久未
達親友半不存華屋成丘墟故壠翳荆榛匆匆
言未竟涕淚霑我巾豈無桑梓念恐與豺虎鄰
徒抱四方志坎壈無能伸悲歌撫長劍離思逐
浮雲平生落魄懷非爾向誰論

結客少年場行

長安紈袴子結交輕薄兒
聯騎白鼻騎飲赴青樓
樓期攜彈射飛鳥呼盧賭
蛾眉不惜千金擲不受
五侯欺意氣薄雲霄肝
膽吐相知感恩重然諾
山嶽終不移

對雨

對雨開青尊長歌飲茆屋
草色入疎簾秋聲起
修竹白雲晚復晴幽鳥
時相逐扶醉看西山山
光青可掬坐遲明月來
伴我北牕宿

山中

雨霽山光明秋空澹凝碧
峭壁摩青蒼灑景呈
朝夕絕磴石峻嶮苔遍
少人跡天風拂面來搔
首岸白憤直上千仞巔
去天不盈尺滿身蒼翠
寒頓覺爽吟膈眦睨萬
象空醉叱乾坤窄朝吸
沉瀼漿夕啖崑崙核未
言闕高踪日與白雲適

山居

山居寂無事山雲閑不收
楓林脫紅葉蟋蟀吟
清秋角巾挂蘿壁長日
不梳頭藉草巖下臥枕
納寒泉流清風時入夢
卽與羲皇遊

登藐姑射山

西登姑射山飄然望蓬瀛馮虛擘烟霧嵐光堆
紫青懸崖挂松桂搖落起秋聲飛泉自空來萬
壑若雷轟谷鳥向我語野猿識我情探幽不知
倦驂御山之精白雲攜滿袖清風吹長纓倚巖
扣奇石放歌升天行忽見兩羽客遙下丹梯迎
身披玄霞裳綽約朱顏明謂我何適此調笑如
平生酌彼黃金液啖之若木英駕言此別去勿
爲塵所縈還結汗漫遊終期凌太清回首不復
見惟聞雙鶴鳴

苦熱行東呂岫雲舍人

羲和駕日輪怒鞭赤龍起躩踞奔長空火雲散
如綺四方苦鬱蒸如在洪爐裏憑誰掃炎埃有
美鳳閣史呼吸動風雷造物任驅使我欲往從
之汗漫遊千里振衣閭風岑濯足滄溟水飲我
玉壺冰啖我青房李清風來故人明月卽知己
與君暢幽懷河朔豈專美蚤作商家霖蒼生望
久矣

姑射洞

窈窕姑射洞上接蔚藍天松聲度幽壑樹杪飛
寒泉我來隱石几披閱南華篇坐待神人至相

將凌紫煙

集通明閣

愛此清晝長泛酒通明閣壘嶂分紫青幽香散
叢薄醉語天上聞歌聲雲外落安得王子喬借
我緱山鶴欲作望仙遊凌風嘯丹壑

登七星臺

日扶九節杖陟彼七星臺天風曳蘭佩身在白
雲隈馮虛發長嘯欲扣閭闔開招呼王子晉吹
笙送玉杯

羣雅堂公燕

春風扇廣堂煙景媚瑤席飛蓋結青雲文采何
輝赫朱絃奮逸響鏗然金與石當筵範羣品濯
濯自高格豁達同襟期探討窮朝夕贈我紫瓊
華飲我流霞液攀援汗漫遊孰云霄壤隔終慙
捨榆羽獨謝凌風翮

訪友人不值

我來扣郊居欲面不相及山大吹白雲石壁挂
青笠幽林成獨往蒼翠沾衣濕瞻彼同心人斜
陽空佇立

送張嵒峽僉憲之任潁川

生平厭世氛多爲世所誚卜築水雲鄉日把滄
洲釣披褐不裹頭結交多名流緬懷張使君才
與相如儔矯矯丹穴鳳逸氣凌高秋咳唾迸成
珠文章爛若綺少年遊帝鄉布衣謁天子天子
臨明光賦獻子虛章爲有凌雲氣乃授尚書郎
夜吸金莖露朝熏蘭省香一旦遭讒謫分符守
雷澤長吟鶴鵲樓洒翰中條石西遊汾水濱驅
車訪隱淪一見相把袂宛若平生親流水揮素
絃清宵酌春酒呼我方外交贈我雙瓊玖投之
以木桃感君曾見采合劔成雙龍傾心共四海

媿我真酒徒不得常追趨君秉澄清節又過梁
王都悵別蒲東路西風秋欲暮振衣二室峯采
秀三花樹應躡青雲梯好擬金聲賦安能接高
標共拾芙蓉露何時到潁川馮君尺素傳望望
隔千里相思雲樹邊

送蘇都運謝政還山東

遲遲春日暮嚶嚶黃鳥鳴天涯送知己惆悵難
爲情載歌歸去辭謾折長堤柳却憐蘇長公無
心戀五斗上書大明宮勇退急流中解冠挂神
武稅駕還山東祖帳集衣冠春城簇旌蓋蒼生

挽不畱芳草應相待天接滄溟水霞飛日觀峯
知君從此憩誰能躡其蹤林下遂初衣岡頭發
清嘯倦鳥投長林白雲依遠嶠三徑撫松菊一
官臥薜蘿安石不復起其如蒼生何

春日寄所知

蓄鳥啼春林嚶嚶求其侶念彼同心人一別杳
何許斜日落中洲舍情獨延佇愁連芳草深目
送白雲去

寄海上人兼致鏡扇

憶作晉陽客栖爾雙林中借榻臥松雪坐石談

苦空愧非玄度輩得接惠休公別來二三載停
雲思無窮安能依淨土塵跡嗟飄蓬搔首獨延
佇偶值春歸鴻短書寄千里殷勤寫我衷鏡以
代明月扇也生清風對此聊見意若與故人同
以詩代書荅馬雲樓

馬卿有高誼遣使來山居寄我雙錦鱗剖鱗得
素書恍若見顏色故舊情不疎憶昔城南別于
今二載餘相思長夜夢飛越草玄廬夢回見明
月清光照碧疏便欲駕黃鵠徑入瑤臺墟班荆
話我懷臨風執子袂相將弄煙水老作涑川漁

題崔氏林泉卷

崔生玉樹姿逸興寄草莽結廬西山隈風致足
幽賞茂林布重陰珠泉滴清響適此良獨樂優
游絕塵想散髮坐盤石日送白雲往余亦嘯煙
霞得爾為山長相期崆峒巔朝夕同偃仰

孤鶴

翩翩孤飛鶴藻質表貞素不受樊籠羈畏彼緇
塵洿志在凌煙霄安能逐雞鶩惜無雲水鄉幽
栖控朝暮欲奮千里翮三山覓珠樹

巢雲詩集一卷

巢雲詩集二卷

聞喜裴邦奇撰

七言古詩

燕歌行

秋風蕭蕭木葉飛人戍漁陽猶未歸空庭佇立
遲音徽天寒日暮鴻鴈稀含情泣下獨依依愁
看明月入簾幃偏能照妾流黃機

公無渡河

公無渡河河廣且深惡風揚波天吳戴九首萬
里衝泥沙縱有舟楫不可渡公欲渡之將奈何

寧使委道傍勝飼蛟與鼉委道傍穴可同飼蛟
鼉安所從公宜聽妾止慎勿墮其中

江南曲

江草青青江柳長江花夾岸明新妝江南女兒
歌春陽歌春陽送春酒月滿船魚在雷

遊女曲

誰家女郎顏如玉曳錦鳴璫盛妝束晚來拾翠
春江曲春江曲草色迷人不見鷓鴣啼

采蓮曲

若耶溪上蓮花開吳姬越女采蓮來紅顏皓齒

歌頻催歌頻催日將暮鞦韆生塵衣帶露

采菱曲

采菱采到湖水西驚起前灘雙鳥鷺朝見雙飛
暮雙棲暮雙棲無別偶儂與歡不相守

采桑婦行

桑間少婦誰氏子自言家住長安里幼年生長
綺羅叢不理桑蠶與鍼指嫁來顛顛不成妝阿
姑頻促妾采桑自恨紅顏多命薄當逢年少冶
遊郎郎好輕財重杯酌朝飲章臺暮平樂臂挽
騁弓跨紫騮袖出明珠彈黃雀往來遊獵向秦

集言集二卷
川更得名交亦少年一旦俱因邊警去兩年誰
報凱歌還望之不見淚盈頰果是阿郎輕棄妾
南陌愁扳一樹桑東風羞見雙飛蝶願清邊塞
早歸來免使他人誚遊獵

楊白花

楊白花白紛紛飛來復飛去東風愁殺人安得
遊絲長百丈年年縮住六宮春

白紵舞歌三首

銀河清淺白露垂月華涼浸芙蓉池金屏笑出
浣紗姬霞綃霧縠光陸離象筵起舞揚雙眉長

歌白紵奉君帷含情顧笑君莫遺

館娃宮深秋夜長美人妝成出洞房木犀香裊
芙蓉裳迴風舞雪紅袖揚舞罷贈之明月璫願
作雲間雙鳳凰青天碧海從翱翔

吹鳳笙擊鼉鼓椒蘭烟飛黃金廡秋色沉沉月
未午越姬彈瑟吳姬舞鈿翠欲墮避風臺前溪
淥水雜相催胡不劇飲流霞杯盛年一去難再
來

將進酒

將進酒開瓊筵美人玉指調朱絃況值春光濃

似酒萬樹桃花紅欲然此際相逢莫草草舞雪
歌雲任傾倒今朝對花不盡歡明日花飛空懊
惱勸君行樂須及時把酒酌君君莫辭丈夫窮
達自有命奔走紅塵老何爲君不見晉山簡倒
著接巵張白眼小兒拍手笑攔街日日習池醉
不返又不見楚屈平世人皆醉彼獨醒一旦輕
沉汨羅水九歌空著離騷經醉者未必損醒者
竟何益世上人生誰滿百流水不迴東海波長
繩那繫西山日秉燭何妨五夜遊買花詎惜千
金擲將進酒莫停杯隔花黃鳥聲相催眼前有
酒不成醉身後浮名安用哉

行路難

君不見驥服鹽車上太行駑駘翻笑乏筋力仰
首長鳴千里風不逢伯樂無人識行路難行路
難世路多荊棘出門還入門令人長太息投竿
欲釣滄海流驚濤駭浪無時休荷鋤欲采西山
薇豺虎縱橫人跡稀行路難行路難擾擾竟何
之不如守故域科頭箕踞青松陰大嘯長歌貧
亦得來日漸少去日多而我胡爲恒偪側且喜
牀頭有濁醪滿傾一斗澆曾臆

久雨

秋霖不斷雲不飛秋風罷采西山薇柴門水漲
莓苔滑茶竈塵封煙火稀銀漢倒傾夜還晝奔
流萬壑蛟龍鬪我欲練成五色石馮虛補却青
天漏

秋雨嘆二首

秋風吹雨斷還續芙蓉香冷秋江曲山家門掩
日瀟然欲買斗酒無青錢庭槐葉脫烏聲急倚
杖步簷還佇立往歲無如今歲荒問天不語天
垂泣

秋雨瀟瀟風瑟瑟祇見浮雲不見日出門泥滓
一尺深畏路難行傷我心山城搖落天將盱倚
劔長歌白石爛花落寒燈夜不眠披衣坐待東
方旦

憩白雲居

山人愛白雲白雲無羈束掃雲開洞居雲深可
避俗笑脫衣帽挂長松臥聽飛泉瀉寒玉此中
足以託幽棲何必遠遊駕黃鵠

雲樓篇馬子端先生曾夢遊天上十樓因自號雲樓故有此贈

涑川老人半白頭偃眠枕納黃河流天外長風

扶醉夢飛入雲中十二樓十二樓臺夜不閉獨
聽廣樂謁上帝翡翠窗開露氣寒蝦鬚簾捲天
香細拔若木兮眺五城丹梯前導蒼龍精鯨吻
欲吞銀漢水鳳聲忽奏雲和笙朱門玉女雙露
面見之調笑若平生俄然恍惚迷所在天雞亂
鳴仙犬吠紫陽真人親出迎脫贈一雙明月珮
念汝謫去遊人間誰主蓬萊千仞山不知今夕
是何夕復覩仙翁冰雪顏執袂同傾沆瀣酌滿
頭遍插芙蓉萼披閱時開太乙經招邀還上春
秋閣探玄乃授延年術登庸且有匡時略語竟

天風送汝歸虹霓爲帶雲爲衣手把玉塵發長
嘯東方旭日猶未晞覺來令人毛骨爽彷彿此
身在天上頓使煙霞空玉樓惟餘枕簟依蒼莽
空翠溟濛濕鷓冠舉頭那見海天寬五色琅玕
露胷臆千機雲錦生毫端曾披短褐登秘府賦
擬凌雲動漢武懶曳長裾謝五侯獨畱嘉藻鳴
千古而今歸臥舊山中夜夢猶疑在天姥

秋閣夢中所見者故云

明月篇壽孔文谷先生

雨餘萬里秋光淨銀漢昭回珠斗映碧空無際

集言集二卷
六
綠煙消海風吹月飛天鏡鏡中長夜金波流彩
徹五城十二樓馮虛一望無纖翳露華湛湛風
颼颼不知今夕爲何夕素娥乘鸞振雙翮萬古
青天碧海心獨愛當年攀桂客攀桂客爲元宮
孫學海詞源在吐吞腹飽琅玕煥星彩手擎日
月排天閣憶昔蜚英纔弱冠步躡長虹渡河漢
直上瓊樓玉宇間笑折天香夜將半帶雲折得
一枝黃歸來射策獻明光天上臚傳第一甲綠
袍白馬出長楊一旦聲華冠時傑河東瑞鳳鳴
丹穴文衡造士秉三秦絳帳傳經開兩淞正踏

仙人掌上遊復躋鴈蕩觀龍湫寒帷少室三花
樹擊楫淮陰泗水流詩囊收盡寰中景方岳馴
登紫薇省自甘勇退乞還山何事中年宦情冷
黑髮歸來築隱居風洒蘭雪開玄廬高梧作蓋
引青鳳嘉樹屯雲護翠虛卽此幽栖清興發北
牕無夢飛丹闕管涔山下著奇書汾水灘頭釣
明明月將清影蘸清波我欲置之金叵羅把向
尊前爲公壽更倚高寒呼素娥素娥對面宛如
昨相期輒贈長生藥年年人與月同清歲歲月
邀人共酌今年兩度送清輝況復裴航住不歸

玉缸好釀丹霞酒同醉花前舞羽衣

鶴菴行爲鄭文學賦

榮陽鄭氏稱廣文世出東吳家在汾懶曳長裾
恥干謁結菴高臥山中雲雲白山青最佳處手
種長松百千樹松下養雛成大鶴顧戀亭臯不
飛去此雛得之遼海東百年頂鍊丹砂紅玄裳
羽衣自高潔清唳一聲明月空思入蓬萊巢若
木志存霄漢凌長風藻質能爲主人重相看如
獲丹山鳳便開谷口種芝田復于石上鑿清泉
饑茹芝英渴飲泉遐心不爲稻梁牽自栖子真

菴何異逋仙宅日避茶煙傍几席昂藏無足貴
乘軒遠近相通能識客我來初夏令已涼朝夕
親狎形兩忘去住相隨有黃鵠欲將從爾叅翺
翔爾語賢主翁試訂尋真約我騎黃鵠翁騎鶴
秋來有興尋中嶽嶽中石室紫烟流待摘三花
插滿頭更招仙侶浮丘伯同作吹笙控鶴遊

甬東山人行有序

甬東呂中父四明高士也自齊魯過上黨渡
汾南遊龍門取道晉寧以篇什見訪且索予
言因卽其所歷爲贈命曰甬東山人行

越有四明山峯巒撐碧落秀出錦芙蓉空翠洒
寥廓千丈飛流噴雪濤五色輕煙莽丹壑薜懸
石洞深復深云是太古神工鑿中有山人呂甬
東日讀靈篇臥叢薄赤城霞氣染蘿衣鴈蕩林
霏濕芒屨饑餐綠雪茹梅花玉立修長瘦如鶴
不作杜陵白髮愁常期賀監金龜酌有時海上
騎白龍東遊直上日觀峯手把松枝扣奇石一
聲長嘯天門空前歲壺關謁三老復向西河探
孔融今年命駕汾之許題詩先寄裴庸甫同宗
更遇紫薇君一見平生懷盡吐漫揮玉塵接玄
門山靈難爲爾

湖南逸士行

湖南逸士殊清真皎如玉樹出風塵抽毫懶獻
兩都賦吐氣遙凌三楚人萬里青霄飛一鶴孤
高不受人羈縛東上天門攬大荒南遊洛水尋
中嶽去歲來登姑射巔攜書有囊琴無絃江湖
作客寧甘拙世路逢人不取憐談天舌動風雲

氣枕易夢到羲皇前日來車馬填門盛福禍言
之無不應甫也文章憎命達商云富貴由天定
卜到精微如有神聲名雷動便驚人爲爾歡迎
掃蘿徑一見卽知非常倫我亦會聞命之理露
泄玄機無過爾五行妙絕李虛中百錢不下嚴
夫子莫訝揮塵說星辰更喜游心在經史兩年
與爾接清遊坐花邀月揮瓊甌分題席上刻紅
燭脫帽風前搔白頭却恨人生不常聚乘秋欲
向秦中去濯足黃河九曲流振衣華嶽三峯樹
丈夫遠遊心洒然隨行長佩雙龍淵雲臺儻遇
希夷子爲予先扣指玄篇

方外行

近得方外交自負元龍傲故家金陵墟足跡徧
海嶠朝躋日觀峯夜發天門嘯昨從上黨來訪
我汾水隈把手相逢談海嶽一春懷抱爲君開
如君自是青霞士疎放無羈有高致袖裏無錢
能不憂尊中有酒卽快意折巾垢面慵梳頭身
若滄江不繫舟束裝懶帶馮驩鉢作客長披季
子裘壯年落鬼無人識日擁黃壚頌酒德慷慨
悲歌白石篇縱橫醉酒金壺墨興來苦無紙洒

之白練裙眼前走猊驥筆底凌風雲有時洗硯
臨池水池下蛟龍駭欲死北面敢當王右軍東
吳何謝顛長史我亦高陽一酒徒白頭短褐困
塗塗此日江湖見爾輩生平意氣何相孚笑解
牀頭雙玉劍招邀同醉酒家胡醉來振策登姑
射滿空嵐翠霑衣濕閣筆蓮花洞口峯臥聞夜
夜山靈泣

贈張嵒峽憲副

君侯秀出岷峨間長髯白皙芙蓉顏蚤躡青雲
遊帝里更扶赤日排天關獨振英聲騰茂實攜

文握武元無匹筆揮鳳藻氣凌雲腰佩麟符光
照日遠移節鉞自南中開府澶淵才且雄露冕
常經山鳥恠懸軍直擣塞垣空政簡戎清廳事
肅春風初拂旌旗綠退公無事只高眠搦管題
詩滿青竹憶昔尊酒別堯封幾年徒切懷音容
未得裁書頻寄鴈長託飛夢復登龍邇來興擬
山陰發千里風塵將晉謁抱劔容叅幕下籌倚
闌坐嘯樓中月談兵尊俎滅氛埃鎮靜還須濟
世才但恐北門難借寇廟堂虛席待君來

贈陳生

集言集二卷
季方西來遊晉鄙春風吹送雙遊履振策曾凌
鴈蕩雲操觚嘗據烏皮几尊酒相逢誼更投高
歌擊筑夜淹畱何時借爾山陰棹共泛姚江萬
里流

鴈門行送張守戎

鴈門之關高百丈紫垣盤踞青天上朔氣長凌
虎豹嚴邊雲低護山河壯關內居人十萬家關
頭戈戟森如麻八月笳聲吹雪落三秋鴈陣逐
風斜廣武故城今尚在盧龍句注遙相對烽火
無煙士馬閑漠北胡兒俱款塞雖云閩外淨妖

氛聖主年來北顧勤給餉雲中收猛士飛符汾
上召將軍將軍生長鳴珂里玉立清光徹秋水
少年曾向圯橋邊親爲黃石三進履英妙今當
三十強飽諳兵略疇能比蔚將世業繼弓裘蚤
沐天恩曳金紫金紫生輝缺騎鳴吳鉤錦帶曼
胡纓韜鈴日畫平戎策鼓角風喧出塞聲出塞
先聲駭羣醜月明沙磧傳刁斗萬馬長嘶首宿
花三軍共醉蒲萄酒輕裘曉日獵平原巨壘春
風屯細柳將軍將軍氣如虹此去應收不戰功
鴈門保障須君輩勳績還當李牧同

醉歌行

幾年高臥汾水濱茅屋深藏天下春隱几青山
日容與鉤簾明月夜相親疎狂懶步長安陌野
鶴玄猿隨所適獨仗烏藤曉出山偶逢緱嶺登
仙客一笑相看意氣橫歡畱却話歲寒盟同來
月下披玄草漫向風前洒玉觥飄然信是煙霞
友藻思如君世稀有大雅直傾三百篇壯懷縱
飲十千斗平生白眼輕侯王與君傾倒形且忘
醉後狂歌彈寶劔秋空萬里燭龍光

醉歌行奉和文谷先生閏中秋誕日宴仲

川寄興園

兔苑池亭秋日曦高張雲幕香風吹霓旌羽蓋
紛相擁愛客梁王不告疲元宮上仙鳴珮環乘
風來自雲霄間盱衡手弄珊瑚柄入門笑破芙蓉
顏洋洋盈耳歡聲起共采瓊英在芳沚芳沚
波連弱水青平臺氣接函關紫此中避俗亦避
喧白鶴朱鳳隨翩翩乘興揮毫洒醉墨美哉篇
什成瓊璠當筵簫鼓雜前陳客情不厭主情伸
柁乘相從鄴下士倚闌重對月中人衣冠不讓
商山叟長歌紫芝搔白首丹爐大藥鍊長生石

洞清虛題小有婆娑雙袖舞天香滿傾玉盃吞
清光百年此樂樂未央還期慶祚日靈長

醉歌行與林臯夜飲襄陵酒樓

西風搖落汾水秋相送故人紅蓼洲弭棹纔離
漁父港拂衣先問酒家樓一雙白魚穿柳上三
百青錢懸杖頭當樓少婦相調笑我輩豈是真
狂流登樓一望天寥廓坐據胡牀呼酒酌黃花
倒插白接羅玉釵滿傾銀鑿落此物能消萬古
愁多君共踐十年約千里相逢信有緣風流何
謝飲中仙興來拔劍燈前舞醉後連茵甕底眠

百歲人生幾迴遇可惜良辰等閑度一別那堪
六載過昔時少壯令遲暮六載相思深復深天
涯秋色莽蕭森此際有懷須盡吐況畱明月照
同心林臯林臯令聚首且進盈觴之別酒我固
因君發浩歌君能爲我擊玉缶令夕何夕良非
偶明朝陌上愁分手我去尋幽姑射峯君歸把
釣黃河口尋盟準擬孟冬初枉駕還能駐此否
儻期重醉酒家胡一飲更傾三百斗

奉和孔丈賦小田種菊盈園招飲菊花酒

歌

身言詩集二卷
十四
憶昔陶公宰彭澤折腰懶向督郵前拂衣解印
賦歸去嘯傲東軒信有緣高趣潯陽結爲隱清
風晉室推其賢種秫僅能供濁酒種菊端爲制
頽年獨愛此菊有佳色采之宛若黃金飭百慮
不從醉裏祛九華空負籬邊植今有貴公子系
出平原家人自清真興自賒釀酒爲延中岳史
闢園祇種東籬花史也逸氣逼清湘稅駕歸來
二十霜披風偏作羲皇夢洒翰能令松菊香此
時公子頻邀酌悠然不減陶公樂常得青尊泛
菊英也應勝煉丹爐藥

寄贈馬守戎

伏波將軍騎鋏驄雪晴出獵天山東勁挽驂弓
如滿月一箭射墮雙飛鴻歸來仍醉蒲萄酒夜
唱邊歌擊刁斗烽火無煙士馬閑春風煖拂營
門柳

郊遊墜馬戲柬呂舍人兼貽王守戎

春郊煙景麗同作采芳遊恠余不策烏藤杖隨
君亦跨紫驂騶驂騶元是追風騎馳突那攬青
絲轡貪看煙樹擁前村不道風波在平地解鞍
斜墜軟紅塵恍惚空中飄此身驚心豈是養生

身言集二卷
者科髮翻成落帽人君不見杜陵客縱酒酣歌
自高格白頭醉控紫遊韁安知落在瞿塘石我
令懷古發長嘆伏枕當歌行路難病腰愈爲耽
詩瘦惡況還須對酒寬酒盡詩成特寄君牡丹
春色開幾分無能領略花前景徒切瞻依谷口
雲再告呂內史復致王將軍莫教輕棄五花文
擬踏賀蘭山上缺必須此馬策奇勳

王使君龍門圖

丹青削出龍門山孤高插入霄漢間馮虛下瞰
龍門水浴日涵天流未已憶自神禹開鴻蒙靈

源出向崑崙東巨鼇鼉載其下側景搖動虛
無中丹梯接雲霧黃河奮蛟龍晴旭凌蒼巘陰
風吹白虹乾坤勝槩無過此奇者勢與匡廬瀑
布相爭雄峭壁巉巖隨蕩漾驚濤噴薄三千丈
欵聽春雷萬壑鳴洶洶壘泛桃花浪中有仙人
鞭赤鯤九曲洪流任吐吞探珠踏破驪龍窟袖
挾長風謁帝閣相逢却恨登龍暮謾就霜縑聊
短賦祝君好作濟川舟莫負當年從此渡

武林山水障子歌

壯哉武林之名區移入君家紫翠居吳山空青

集言集二卷
若可掃高峯想像敵匡廬嵐氣溟濛望欲迷烟
村霧樹連翠隄百折丹巒踞虎豹六橋流水奮
鯨鯢坐遊錢塘江興寄飛來峯鶴馭鸞駮倏來
峯之側風帆浪舸宛在江之中杯瞰西湖塊覩
南屏峭壁峻嶒屹相向水花岸草舍芳馨舟人
漁子弄清淺鷓鴣鴻瀾眠沙汀長松疑帶雨陰
壑似生寒洞門彷彿出仙鬟雲蒸霞蔚千萬狀
分明滉漾几席間我生素抱山水癖青鞵布鞵
處處尋名山尋之不得盡奇絕偶披此障使我
開心顏恍疑此境會冥搜湖山生色明雙眸何

當卜築南屏下拂衣飄然事遠遊躡足陵丹梯
身與白雲浮四望渺兮無際窮笑傲兮夷猶時
時泊烟渚日日乘釣槎製秋衣兮采荷芰抱明
月兮宿蒹葭倚風發長嘯招尋林逋家謾引寒
香凝肺腑相將和雪茹梅花

麻姑篇爲毛我山使君賦

蓬萊屹立雲氣紫萬壘芙蓉插天起峭壁高懸
上古松長蘿下蘸滄溟水扶桑日出天雞鳴雲
輶芝蓋紛相迎中有一仙人不識自以麻姑爲
姓名耳懸明月璫身曳青霞珮夜宿赤城隈日

集言集二卷
逐羣仙隊朝見花開幕見飛不問人間是何代
綽約不改冰雪容采芝五嶽躡星虹往年曾到
蔡經處今歲遙扳姑射峯姑射主人東海客玉
立修髯自高格明世堪爲柱石臣漢庭蚤上天
人策雞舌曾含畫省香虎符令縮黃堂伯撫字
三年惠愛深循良一日聲名赫郡中無事但吟
哦坐攬姑射青嵯峨曉汲汾流釀春酒正值麻
姑雲外過一笑相逢攜素手花顏雲髮還依舊
長爪猶堪背上搔何物把向尊前壽未帶班麟
脯先贈細核桃此桃不數千瓊瑤啖之令人生
羽毛爲言二千石元是謫仙才更授長生術洞
然曾臆開大嘯一聲海天碧欲去不去相徘徊
從此丹臺訂佳約一年一度壽君來我向三山
理笙鶴君當商室調鹽梅莫道仙凡兩超隔五
雲深處卽蓬萊

書源泉王孫卷

瞻彼姑射山峯巒青嵯峨煙霞自吞吐日月相
盪摩麓有源泉出石竇倒激雲根噴雪波下通
星海上接天河分流萬派成盤渦之子何年住
其側日漱瓊瑤餐玉禾不巾不鞵自高格坐據

白石眠青莎時聞泉韻響彷彿爾銜哦爾徒翫
此清泠水何不釀之成白醪招邀狂客百遍相
過滿飲十千金叵羅澆胷中之磊砢放舞影之
婆娑笑挽白龍叱走靈鼉拂衣拋擲珊瑚柯掬
泉弄月月在手醉語蟬聯呼素娥安得爾鼓雲
和瑟和我一曲源泉歌

題李在山水圖二首

千巖萬壑雄天姥遠樹明霞帶秋浦山開乳窟
噴晴煙石迸飛泉洒寒雨紅葉林中停小車幽
人指顧西天涯雞犬遙聞翠微裏白雲縹緲是

誰家

樹影重重雲漠漠四壁嵐光映江閣紅衣疊泛
水生香白鳥雙飛情自若山翁睡起日西流坐
受清風不裹頭江上何人弄漁笛一聲吹破楚
天秋

趙子昂畫馬圖

學士曾遊大宛國驊駟寫作桃花色渡水猶憐
錦障泥追風欲脫黃金勒花開首宿幾經春顧
影長鳴似逼真何時遂爾騰驤志踏破龍沙萬
里塵

酬蘭軒惠椰瓢

美人贈我日南瓢不煩手掬渴自消汲泉常注
翠微色酌酒能將明月邀山家得此爲珍器詩
草作丸亦堪置或時不用樹頭懸縱有風聲何
忍棄

綠竹歌荅虞田

我愛君家草堂靜一區雲構中條麓剪徑新栽
十个竹霜幹移來自淇澳奪日爭看鳳彩明凌
霄可望龍孫育此君有主能抱節渭川千畝曾
中畜謝却華簪戴箨冠腹飽琅玕不食肉夜寂

時聞簫籟聲月明夢繞簷營谷往年看竹到君
家百遍相過不待速今歲重看已作林林下清
風生萬斛陰森疑是辟疆園檀欒足寓玉猷目
便脫絺衣挂翠梢萬竿煙雨消煩燠君當把酒
我擊筑醉來同作瀟湘宿豪吟爲我興翻飛牆
頭一掃霜毫秃惟爾長歌綠竹篇湘靈夜抱蒼
雲哭

畫竹爲劉登山憲伯賦

歷代寫竹誰爭長宋有文同今夏昶眉山蘇
亦擅名文也清潤夏蕭爽此幅不知出誰手登

筆縱橫世稀有萬竹俄生萬頃煙千竿可比千
瓊玖憶從何處識此君月明環珮洞庭聞自別
英皇罷瑤瑟至今淚染成斑紋瀟瀟猶帶湘江
雨裊裊如凌渭畝雲今見此君更殊絕檀欒尚
傲梁園雪風露泠泠滴翠寒子規夜叫何曾裂
當年衛武並稱賢此日劉公同抱節劉公愛爾
獨清修高邁何如王子猷夕聽秋聲起竿籟日
看疎影依林丘竹兮竹兮爾增重翩翩好栖河
東鳳有時鳳向舜庭儀九成擬作簫韶用

畫菊爲劉登山憲伯賦

憶昨訪君草玄屋滿坐風生香馥馥俯看堦下
無一花壁上誰知有叢菊誰將此幅鵝溪絹信
掃秋英動人目點綴參差清且奇全開半開若
有期寒芳自惜香堪嗅晚節能堅蝶不知淺淡
真成傅粉妝鮮穠不謝紫雲娘肌凝曉雪幾經
歲面帶春風那畏霜浥露迎風各有態同心倚
伏朝中央花神貞潔元無匹迺出涇陽劉氏筆
借問從來識者誰陶令相知最真率自賦歸來
懶折腰一代高風壓晉室悠然寄傲東籬邊坐
對南山獨抱膝白衣遠送青尊來正值花開重

巢雲詩集二卷
九日笑采九華泛濁醪銜杯與爾情偏逸我見
此花形逼真惜哉不見陶徵君今有河東劉憲
使雖云異代堪同羣劉也拂衣捐五斗天書曾
賜歸田畝日臥玉鉤原上雲時呼白墮村中酒
圖間僅對數枝花門外新栽五株柳醉扶柳影
上藍輿趣高不落淵明後

巢雲詩集二卷

巢雲詩集三卷

聞喜裴邦奇撰

五言律詩

關山月

明月關山滿清輝夜未殘黃沙迷塞遠白露滴
秋寒念妾閨中望知君馬上看歸期何日定早
爲靖樓蘭

長安道

佳麗長安道香風拂面來旭光明劒珮春色醉
樓臺鳳吹朱門起鶯花紫禁開相逢遊俠子馬

上臂鷹迴

隴頭吟

誰念邊人苦年年戍隴頭風沙迷戰壘霜雪敝
征裘鴈度交河水鷗盤大漠秋遙聞哀角動落
日淚雙流

王明君

自恃傾城貌翻成去國愁此身歸處塞何日返
皇州朔鴈驚魂斷交河逐淚流琵琶彈夜月猶
憶漢宮秋

銅雀妓

高臺控鄴城羅綺重含情自嘆君王歿誰將玉
輦迎歌鐘清夜斷舞袖暗塵生望極西陵樹惟
餘片月明

妾薄命

搔首鬱徬徨空庭午夜涼花飛連理樹香冷合
歡牀夢隔蒼梧遠愁縈碧草長自知妾薄命不
敢怨蕭郎

胡姬年十五

胡姬年十五家住薊門東擾擾雙鬟綠盈盈一
笑同卷簾開夜市畱客醉春風更喜門前柳長

條繫玉驄

賦得盈盈樓上女

盈盈樓上女長日倚危闌千里靡蕪綠一簾風
雨寒彩雲春夢斷青鏡曉妝殘自製相思枕馮
誰寄所歡

紫驄馬

驄馬非凡種產自渥洼傍能馳千里足那惜百
金裝酣戰胡霜冷騎嘶塞草黃不辭流汗血直
欲淨沙場

折楊柳

步步垂陽陌遙憐蕩子行綠條空自折黃鳥爲
誰鳴暮雨顰愁黛東風縮別情緘書前日至猶
戍亞夫營

梅花落

寒夜不成寐徘徊月色新誰將雙玉管吹落一
枝春香未銷殘雪花宜贈遠人回看清影瘦無
語淚霑巾

賦得嶺上多白雲

振策登高嶺白雲滿壑飛捲舒常自若出沒本
無機懶近蓬萊闕輕霑薜荔衣不堪持贈遠南

望復依依

雨晴晚步

雨晴聊寓目斜日下巖阿野興隨烟水幽棲任
薜蘿遠山空翠爽嘉樹晚涼多更遇垂綸者相
將鼓枻歌

雨後獨酌

梅雨初晴後風來澹似秋隴雲低樹合溪水抱
田流門靜堪羅雀身閑但狎鷗一尊聊自酌坐
對晚山幽

元日值雪

倦客居無定他鄉歲屢遷野堂生淑氣朔雪兆
豐年兩鬢驚垂白孤栖尚草玄屠蘇還自壽漫
和郢人篇

懷藐姑射山

數載違姑射朝來爽氣生薜蘿應有待魚鳥未
忘情雲破千峯出雷奔萬壑鳴吾將遊汗漫欲
作御風行

重遊藐姑射山三首

翠壁乘春眺丹崖拂曉行松筠重訂約猿鶴舊
知名遙聽珠泉響疑聞玉珮聲倚闌重搔首天

際白雲生

坐石披空翠樵歌送玉觴日銜山氣紫花泛水
痕香冰雪人何杳烟霞思轉長願言同步屨去
去采瓊芳

拂袖香風煖撩人春色多晴川飛白鷺烟樹挂
青蘿水石供清賞乾坤入浩歌明朝還載酒餘
興付滄波

登西山見龍子祠

曉躡西山磴山高可振衣俯看龍臥處煙霧鬱
霏霏花片流丹壑泉聲出翠微列仙如有待欲

跨白雲飛

與王霽宇明府談栖霞洞

往歲栖霞洞王喬飛鳥來御風遊汗漫題石掃
莓苔春入千峯秀河蟠九曲迴碧桃懸洞口猶
待令君開

溪居

結屋依紅樹開門對白沙晴川飛鴈驚宿露洗
蒹葭夜弄溪頭月朝餐水上霞恐人來問渡不
復種桃花

西郊

集雲詩集三卷
五
曳杖過汾渡西郊日轉晴獨憐山色好閑傍柳
陰行石逕蒼苔滑村橋綠水平翩翩雙白鳥似
識野人情

夏日郊居

野曠墟烟白林深晝景長客來慵戴笠獨坐喜
焚香梅雨堦除淨松風杖鳥涼月明散幽躅不
出水雲鄉

憩清涼館獨酌

爐頭沽酒酌坐揀杏花陰歌竟憑誰和杯乾且
復斟却憐今夕興不共故人吟惟有春空月盈

盈照客心

登平霞閣望汾水得閑字

霞閣聯高會相逢共解顏馮虛一以眺汾水自
潺湲練色秋雲外波聲夕照間却慙長作客何
似野鷗閑

墟落

墟落春城外山光碧四圍橋通沽酒市門對釣
魚磯燕子穿林度桃花帶雨飛更憐雙白鳥相
伴采蘋歸

春日卽事四首

集雲詩集三卷
隱几春風裏幽居可樂饑遠山青入座芳草綠
牽衣溪暖從兒釣家貧過客稀去年雙燕子今
復傍人飛

落落乾坤內春風興自幽無魚寧足嘆有酒復
何求釣月一竿竹濯纓萬里流孤踪常自若寒
暑付羊裘

累月常披髮一春不啓關攤書眠白日倚杖看
青山鳥哢驚殘夢花開破醉顏夜來春雨足隨
意弄潺湲

江海一尊酒桑麻五畝園門無問字客家有報
時猿徑點苔痕綠牕搖竹影繁晚來風月下身
世已忘言

五日有懷汾上舊游

往歲栖汾上西園共舉觴菖蒲浮酒綠荷葉染
衣香節序還今日風烟各一方離情縮不住空
置絲絲長

慶成西園午日招宴同蘭社諸君應教二

首

客裏逢佳節西園拖乘來熏風蘭殿起醴酒桂
宮開黍角陳雕俎蒲香瀉玉杯夜深猶度曲不

放彩雲迴

西園佳麗地何憚曳裾來海燕穿簾度宮花倚
檻開沉湘誰弔古激楚自銜杯況接應劉輩安
能不醉迴

苦熱集仲川社中

袒跣洪爐裏熯然苦未勝意將回赤帝渴欲飲
清冰陰洞雲猶濕仙莖露不凝主人歌白雪端
可破炎蒸

秋懷

搖落西風候孤城晚自陰長空哀鴈度細雨亂

蛩吟對酒他鄉客悲秋此日心緬懷舊游處相
隔水雲深

客中秋夜

對酒聊彈鋏乘風漫倚樓關山橫片月礎杵動
高秋萬樹霜華冷千門夜色流誰家橫玉笛吹
起越鄉愁

七夕

穿針迎巧夕結伴向妝樓夜靜明河轉天空大
火流曲闌徒倚月薄袂不禁秋自分生來拙何
勞問女牛

十四夜宿水頭無月

旅夜投孤館蕭然惱客情亂雲垂雨色高壘枕
河聲海宇今宵月關山幾處明清光應未滿尊
酒爲誰傾

中秋夜

皓魄今無恙清虛近可依星河直北望烏鵲自
南飛桂宇天香遠松庭夜色輝不堪風露下冷
浸薜蘿衣

中秋有懷

把酒待明月月出海東頭皓彩當空見金波接

漢流關山凝遠望松桂動高秋不盡懷君意西
風獨倚樓

中秋期友人不至

有客成修阻難同此夜懽羽觴聊自酌瑤瑟向
誰彈鴈斷霜華冷樓高月影寒仙居望不遠吾
欲跨青鸞

中秋臥病值雨柬呂岫雲

雨浥清虛境風烟起暮愁空懷千里月却負一
年秋冷浸文園病光沉庾亮樓不知天柱上誰
與事清遊

十五夜雨霽

雨氣當空散雲陰向晚開坐邀明月至何異故人來碧漢金繩度清風玉笛哀嬋娟如有意常照紫霞杯

十六夜

此夕興不淺銜杯更倚樓試看千里月方減一分秋短笛穿雲響明河隔座流西風拂醉袖猶有桂香浮

十七夜

見月偏忘寐清光況未殘簾開香霧濕露下碧

梧寒節序驚蟾魄風塵老鷓冠遙憐征戍客應倚玉門看

九日無酒

苦乏杯中物慵登雨後臺翠禽空自舞黃菊爲誰開久客慚書劔幽栖託草萊西風獨延佇不見白衣來

九日無菊

物候偏驚客林亭獨舉杯如何三徑菊不向九秋開積翠生蘿壁高雲傍石臺故園書未達愁絕斷鴻哀

蘭社諸君九日峪中登眺予以他事不預
以詩訊之

竝馬尋幽谷風流可讓君勝遊曾訂約佳節奈
離羣泛酒應黃菊徵歌必紫雲不知題竹否麗
藻願相聞

冬夜月下與張弘堂王會川中川言別

江海慙爲客雲霄幸識君引觴呼月出移榻坐
宵分自是河東鳳行空冀北羣春風花似錦好
醉曲江濱

除夕

夜對青燈燦年催白髮新僑居羅雀巷且作飯
牛人草具方辭歲梅花已得春牀頭濁酒熟何
事更憂貧

栖真館同丘使君宴集

半載畱高館幽栖與世違看梅驚物候藉草對
春暉我抱紫霞想君來黃鶴磯不期千里晤清
興各翻飛

道院避暑

避暑仙遊館烟霞接上清松門停鶴轡花嶼出
鸞笙袖拂天風爽杯邀海月明夜深羣動息好

身言集三卷
作步虛聲

同呂岫雲登七佛巖寺值雨

秋日登靈境蒼茫野色連蛩聲吟四壁雲影亂
諸天佛閣飛花雨僧廚濕茗烟相將坐磐石揮
塵共談玄

望靈巖寺

遠道瞻靈境氤氳寶氣重雲心微露塔谷口忽
聞鐘象教何緣得龍華未可逢行行復延佇吾
欲叩禪宗

正月十六夜同諸友集大雲寺

夜色橫金界春醅泛紫霞幸逢高士輩同醉梵
王家月挂諸天鏡燈開萬象花不妨歸路遠此
地有三車

經廢寺

駐馬投荒寺空林苦鬱蒸路迷青草際鐘斷白
雲層鳥篆畱僧偈螢光照佛燈性真原不滅興
廢自相仍

海雲洞

窈窕初開地清虛別是天我來尋玉洞不爲禮
金仙寒翠流祗樹空香繞梵筵何當常借榻日

就海雲眠

過海雲洞有懷

散步城南寺吟袍振野風松壇遼鶴返石洞海
雲空白社虛陶令緇衣失遠公靈光猶未滅長
夜照禪宮

重過海雲洞

重過海雲洞洞深雲氣涼昨宵曾聽法今日更
揮觴天雨霑衣潤曇花撲酒香歸途莫畏晚自
有玉毫光

九日集古峯洞

值此重陽日幽尋太乙家長風吹白幘湛露洗
黃花弔古龍山杳馮高鴈字斜漫勞人送酒仙
洞有流霞

九日集大雲寺

宿訂禪宮約今來興益長蓮開陶令社菊發遠
公房舉白酬佳節登高借上方祗林風露下滿
袖挹空香

過定上人蘭若

蘭若依汾曲鐘聲隔隴聞衆香紛繞榻雙樹直
侵雲鉢注蓮花水經翻貝葉文重勞招白社愧

集言集三卷
比陶徵君

大雲寺蘭若

夙聞西土淨
今作上方行
蘿徑少人跡
松齋足梵聲
花隨雙鶴舞
樹隔一鐘鳴
何物僧爲性
潭心蘸月明

寄題海上人蘭若

聞道幽栖處
門垂雙樹陰
鶴盤青嶂遠
僧臥碧蘿深
海月低禪榻
天風送梵音
西游定何日
蘆葉渡江心

迴光寺訪僧不遇

駐馬迴光寺
山空人跡稀
祇園春不到
開士日相違
振錫知何處
聞鐘悵獨歸
那堪重回首
漠漠隴雲飛

謁女媧祠墓次孫使君韻

上古媧皇氏
遺墟尚有村
荒丘松葉暗
古殿鳥聲喧
天缺元能補
神功未可言
乾坤開闢後
帝德至今存

晉侯故城

馮高望不極
弔古意何窮
無復鑿輿駐
空餘雉堞雄
山河非晉業
禾黍變唐風
惟有梨園月
年

年照故宮

與吳宋畢呂陳氏叔姪城北登眺

郭外風煙好相攜並馬來座移花影動尊向竹林開峭壁凌空起春流繞樹迴多君揮醉墨不謝建安才

登高

逆旅逢佳節登高望故鄉西風吹落木朔鴈下斜陽酒泛黃花露衣霑青女霜遲留情未已思逐隴雲長

吾愛吾廬

吾愛吾廬好蕭然暑不侵清風三逕竹流水一牀琴枕石便高臥銜杯勝苦吟酣歌明月下傲寄白雲深

過呂舍人綠井莊望仙洞

綠井蕩秋光追游興轉長滿沽村市酒同醉水雲鄉鷗社開芳者漁歌載野航欲扳神女洞烟霧鬱蒼茫

綠井莊與王竹澳宴集

內史耽清隱山居傍水隈波翻林影動風遞鳥聲來景與龍眠會尊留鶴駕開諸君好乘興共

身雲言集三卷
踏月明廻

寄題李平石明府山居四首

北牕供晝寢南畝歇春耕宿雨石田足涼波竹
簾生松花釀酒熟雲物逼詩成來往逢人客無
勞說姓名

幽居人境外觸目景常新几杖堪隨事纓簪不
繫身野花香拂袖山翠冷侵人長笑辭彭澤惟
餘漉酒巾

百里辭青綬十年臥碧山無媒通野逕有藥駐
春顏載酒黃花外分題亂竹間何時同醉月攜

手放歌還

自別鄉山久誰憐客路貧欲乘剡溪棹還覓武
陵人寒盡那知歲花開始見春相從隨所適物
外一閑身

重遊汾上孔園登高二首

復值重陽日還登百尺臺人同前歲健花似故
園開主客歡無極風塵倦未廻況逢新酒熟何
待白衣來

莫擬登樓賦惟應對酒歌黃花如舊好白髮竟
誰多掃榻延雞黍尋盟到薜蘿獨憐重九日兩

度客中過

題呂岫雲綠井別業

結屋長林下鑿池亂竹間
心同碧水淨人與白鷗閑
蔣詡新開徑陶潛常閉關
樂爲松菊主不負舊青山

過呂岫雲山居次張嶺山韻四首

訪君乘短棹疑是剡溪來
鶴鶴盤空下芙蓉傍水開
摘花香薦酒題壁墨湮苔
風致常如此何曾有俗埃

拂袖成高蹈歸山發浩歌
自開三徑隱常抱一

琴過選杖分青竹裁衣借碧蘿
憐君高臥久其奈蒼生何

雲水幽深處移家向此中行歌
楊柳月坐領芟荷風洞口飛蒼靄
池心湛碧空閑居應有賦逸興自無窮

落落山中相悠悠物外心投竿五湖水
結屋萬松林明月頻來往白雲自古今
誰知巖穴裏時有臥龍吟

張弘堂明府郊居四首

別業中條下幽栖興洒然
栽花乘宿雨鑿沼得

春泉峭壁丹霞映高蘿碧樹懸夜深遲明月把
酒醉嬋娟

作客依山墅披襟適野情水邊傾桂醕石上戰
楸枰嵐氣凌空翠花光照眼明何當常寄傲杖
屨日閑行

竹里人稀往松門我獨尋端居清世外思入白
雲深煙樹團青蓋風泉奏玉琴客中多謾興搔
首一長吟

長夏郊居靜林深白板扉曉雲橫石榻寒翠濕
麻衣孤鶴山中怨雙鳥海上歸郎星在霄漢夜

夜動清輝

社中諸君見招同文谷宴集南原別業

地僻炎氛淨林深晝景遲問花嬌不語題竹雅
相宜白鳥隨供帳清風倒接甌況同山簡醉何
謝習家池

東臯王孫蘭雪堂作社會

一宵微雨歇四座晚涼生地卽平泉墅人同洛
社英松雲流几杖蘭雪洒簷楹不盡天真樂其
如地主情

孔文谷先生與鄭鶴菴雨中見過

集言詩集三卷
寄跡金蘭館重門掩碧苔驚回孤枕夢幸有二
龍來烏角迎風折青尊對雨開西牕堪秉燭車
馬且遲迴

同劉石樓夜集呂舍人宅二首

幸逢花縣宰同過紫薇君大白浮春酒清歌度
夜雲百年能幾會半載惜離羣情洽方謀醉蒼
涼曙色分

高館開清夏華燈促晚筵房櫳深却暑花竹澹
生煙視草仙郎貴彈琴茂宰賢主賓傾倒處安
得夜如年

孔宅同蘭軒宴集

同游虛白館高味豁襟期莫厭杯行促偏宜漏
下遲酒筵春熟候梅放雪晴時忘却他鄉念相
逢盡故知

老母生辰值無逸王孫餽真珠酒

萱室逢初度柴門曉正開祇知青鳥集復道白
衣來喜惠真珠釀慙無琥珀杯聊將介眉壽春
色醉蓬萊

贈呂舍人歸田

自製歸田賦孤高與世違絲綸辭鳳閣烟水占

魚...言集三卷
漁磯海鶴凌空度山雲出岫飛漢庭徵舊德未
許臥巖扉

贈胡惇菴將軍

三十虬髯將風雲壯氣橫龍沙秋破處虎帳夜
談兵劔拂胡霜白旗翻塞月明燕然須北望計
日勒勳名

聞張嶺山遷河南憲副遙贈二首

萬里蒼梧野蠻煙翳渺冥美人天共遠芳草日
常青南極移卿月中州動法星夜深抱瑤瑟未
許戀湘靈

數載難爲別孤鴻杳不聞登臺成浩嘯倚劔對
斜曛蚤渡湘江水還披少室雲夷門抱關者遙
待信陵君

贈劉金湖明府二首

地僻飛鳥遠天空列宿明風裁元楚望詞賦卽
劉楨翠壁環廳事瑤琴寫宦情夙懷經濟略不
獨有詩名

百里才應屈一官政自優春風花作縣勝地石
爲樓吏散鳥常下簾垂山更幽興來歌白雪巴
里詎能訕

送崔子之維揚却上金陵訪王憲幕

白野霜華重青山霽色開呼童畱別騎為爾薦
離杯興寄揚州鶴書傳江浦梅好同王子晉長
嘯鳳凰臺

送康衢遊桃花洞兼寄林臯

送爾尋幽境中條路不賒白雲飄縹處石洞出
桃花定擬逢仙侶相邀醉紫霞無緣近笙鶴寄
此代瑤華

春日月洲見過且有太原之行

羅逕車塵遠柴門樹影稀春風隨客到谷鳥傍

人飛暫解芙蓉劍相褰薜荔衣夙懷論未盡遲
爾晉陽歸

月洲來自汾上持孔丈書復過却歸蒲坂

君歸寒食候煙樹雨晴初為次汾陽道遙傳闕
里書桃花紛送酒芳草復牽裾更約春湖上扁
舟夜打魚

送守公還山

支公還舊社滿路雨花生自愧非玄度相期入
化城紫雲隨杖去白鴿出林迎遙指中條月依
然定處明

集言集三卷
雨霽渡汾有懷舊遊

路入汾河曲空濛雨氣收馬嘶青草渡漁唱白
蘋洲旭日千峯曉清風五月秋據鞍頻極目人
在水西頭

寄張敬菴山人四首

故人成隔越世事轉蹉跎萍跡天涯寄花時夢
裏過開尊聊自飲擊筑共誰歌日暮停雲望相
思奈爾何

杖屨相違久思君切素衷寒衣望明月搔首候
歸鴻白髮艱虞際青春感慨中爲言吾道在未

可嘆途窮

憐君逢末路倚劔發長嘆名重遭時忌才高處
世難風雲歸嘯旨江海任漁竿莫爲樊籠繫緇
塵暗鷓冠

悵望雲千里相思天一涯經年懷玉樹何日寄
瑤華路接平蕪遠山銜落日斜還期同掉臂醉
袖拂烟霞

寄呂岫雲四首

矯矯青雲客卜居汾水邊清風千畝竹旭日萬
家煙酒熟開吟社荷香泛釣船惟余生事拙長

向北牕眠

暮倚西樓望烟霏
杳不分未騎黃鵠去
長憶紫薇君別夢
牽湖月幽居隔隴雲
懸知登眺處應亦念離羣

憶昨逢初夏曾來扣竹關
漁歌楊柳渡舟艤
蓼花灣野席那分客
村醪亦解顏不知從別後誰與嘯青山

近日臨東圃披風坐石苔
自違高士久安得好
懷開謝傅遊山墅
阮公覓嘯臺更憐花竹好常待主人來

寄嬾雲上人

自著鳩巢集江山興不窮
詩瓢長貯月禪錫遠
凌空老鶴知心苦
閑雲與性同吾將依淨土志在擬休公

寄郭上林

憶昔河東日同傾雙玉瓶
登樓山氣紫倚劔海
光青一別書難達
相思鬢欲星西牕夢回處風雨夜冥冥

守公自南畿取經還山寄贈二首

有道方袍侶三秋會面稀
觀空登北固卓錫至

南畿白雪多盈鬢
緇塵不染衣
雨臺遊歷遍
却伴海雲歸

聞道金陵返生涯
只舊瓶
臨風嗅蒼荀
帶露服松苓
十笏青蓮宇
千函白馬經
此時應講閱
靜聽有山靈

客中見歸鴈寄所知

久客山城下
斜陽獨倚樓
偶逢歸鴈過
偏動異鄉愁
烟水連芳杜
薜蘿接遠洲
尺書今附爾
爲我寄同游

期劉定宇不至

袒葛乘清暑
翩翩逸思生
美人招不至
孤客若爲情
梅雨清苔徑
松雲傍石枰
臨風久延佇
野鳥自嚶嚶

得梁山人書

故舊各南北
停雲思渺然
忽經三載別
今得一書傳
朔鴈衝寒雨
秋江接暮天
幾時重把手
同和紫芝篇

得孔文谷先生書

霞館曾分袂
雲林自索居
忽聞千里鴈
遙致八行書
遠道勞相憶
春盟定不虛
待將蚤梅發
先

集言集三卷
寄臥龍廬

酬張嵒使君見訪

蓬鬢從吾懶柴門待客開
那期羅雀巷却有臥龍來
斜日輝塵榻清風掃石苔
相看一笑別紫氣滿蒿萊

酬呂岫雲綠井莊積雨見懷四首

四顧雲猶合層空雨復來
石林多野趣水館絕塵埃
白雪勞君贈青尊待我開
扁舟不可渡流水亂縈迴

目斷平山曲山連雨氣昏
美人應有待佳況欲

長論好解林中榻重開
竹下尊新晴攜綠醕擬過澗花村

聞君栖綠野風物自清怡
松吹還成曲荷筍亦當危
將尋鳳閣史爲訂鹿門期
更剪西窗燭同吟夜雨詩

竹塢新開社衡門舊有盟
只因黃鳥感乃見白頭情
積水涵天影空林落雨聲
思君獨不見碧草喚愁生

酬張嶺山見贈兼惠秦酒且有龍祠之約
白馬珂鳴玉來過汾水濱
遠攜桑落酒獨餽草

真言集三卷
二十五
堂人開卷詩逾健論交意更親明朝當振策姑射共尋真

次劉明府登文命閣韻

閣在蓮花池禹廟後

山縣梯新閣芙蓉傍閣開滄波流日月紫氣擁池臺夏后承天眷劉昆豈吏材相扳情不極彷彿在蓬萊

次謝山人述懷韻

大陸沉孤客冥心息萬機稽康元傲物伯玉自知非日采金光草雲生白苧衣故園松菊好常待主人歸

次韻荅林臯待予不至

池館橫秋色茅茨掩夕曛一尊勞下榻兩地各停雲玉樹誰相倚清歌獨未聞鴈聲轉嘹唳應亦怨離羣

與表弟劉三話別

愧我空遲暮憐君亦壯夫銜杯話桑梓回首嘆江湖寒杵鄉心碎秋燈客夢孤春來還舊業相與共樵蘇

與魏三江話別

蘭社忻相晤萍踪復遠違自憐爲客久那忍送

君歸塵鬢經秋改鄉心逐鴈飛同遊如見訊代
我致音徽

哭馬雲樓先生六首

吾黨風騷士倏然謝世氛音書三月至生死一
朝分舊社遺玄草新阡起白雲漢庭如有詔應
索馬卿文

懶作遊梁客歸來臥薜蘿青山耽著述白首尚
蹉跎日重文園病風淒蒿里歌重過舊遊地邈
若隔山河

素幔成蕭瑟清揚付杳冥山川橫逸氣霄漢失
文星烟草牽愁亂風花逐淚零中條明月出彷彿見英靈

良晤三年阻哀音百里聞忽驚瑤樹折應撰玉
樓文琴絕高山調笛橫故壠雲懷君如有失寤
寐挹清芬

江海從君逝雲山共我愁那知汾水別竟作岱
宗遊鶴髮瞻如在猿聲哭未休袖中有長劔終
擬挂松楸

痛汝登冥錄憐予滯異鄉含啼拔桂樹望遠酌
椒漿身歿名逾重交深思不忘欲書徵士誄嗚

咽不成章

讀趙蓋齋郡丞榮親會編四首

捧讀榮親卷儀刑見若翁芳傳清獻後祀入素
王宮道脉江河遠文名日月同至今汾上士猶
在舊春風

梁木摧何早斯文失所從芳華青史載幽壠白
雲封夜冷烏栖月風高鶴唳松招魂空有賦無
處覓仙踪

仰止東山境天空隕少微清風誰竝駕達孝世
應稀俎豆明時薦弓裘奕葉輝高門君不忝五

馬炫金緋

昔擬閑居賦令悲風木吟淚隨江雨墮思逐隴
雲深報國遵庭訓榮親播德音常存忠孝志應
慰九京心

美人圖

想像揮毫彩丹青品入神翠眉應妬月羅鞵不
生塵延佇嬌無語慵妝暗惜春慙慙常在目莫
負卷中人

與王明府坐御風岡鼓琴

箕坐鴻蒙石登臨興不窮紫雲凌劔鳥白雪洒

集賢言集三卷之二
三
絲桐柱笏千峯出盱衡萬象空好期王子晉常
此御天風

鴈

萬里關河鴈隨陽自北歸長橫霄漢去不戀稻
梁肥彭蠡乘秋下瀟湘帶雨飛天涯畱滯客見
爾獨依依

孤鴈

鴈度霜初下山銜日已曛低空愁學字回首怨
離羣孤影投寒渚哀聲落斷雲授衣時復至悽
惻不堪聞


孤鴛

睡羽因風整鳴音竟日愁寒塘憐獨浴春水憶
同遊夢落青蘋月情牽白鷺洲何時逢舊侶交
頸與沉浮

探花

自作林園客探花日往來倚闌問桃李步屨印
莓苔綠酒應將熟紅芳尚未開東皇如有意好
起惠風催

巢雲詩集三卷



書名	
版別	冊數 2 紙
定價	15.—
編目	字第 117 号
北京市中國書店定價簽	

程